

Fundacion Accion Ambiental no ta kere cu e ceramento di dump na Palo Marga lo trece un solucion

Pero mas bien un caos hopi grandi pa cu e maneho di sushi

ORANJESTAD - Fundacion Accion Ambiental ta lamenta cu ta laga cera Dump na Palo Marga Dia 3 di Mei 2005 sin cu tin un solucion y maneho pa cu e Dump na Palo Marga. Cerando e Dump na Palo Marga na San Nicolas ta trece cune un caos masha grandi pa cu e maneho di tira sushi pariba di brug y na unda cu esaki ta haci cu un gran parti di sushinan ta bai wordo tira na diferente parti di nos isla terciendo asina dumpnan ilegal cu ta causa dañonan grandi na nos medio ambiente y na sitionan proteha pa cu naturaleza.

Un dump no por wordo cera di un dia pa otro sin cu tin un otro sitio di alternativa.

Ta berdad cu e dump ta wordo sendi na candela pa personanan irresponsabel cu ta tira sushi, pero si bo no tin

un maneho pa cu e Dump na Palo Marga y vigilancia esaki sigur ta bira un free for all. Fundacion Accion Ambiental no ta kere cu e ceramento di e Dump na Palo Marga lo trece un solucion pero mas bien un caos hopi grandi pa cu e maneho di sushi tanto pariba di brug como tambe aki na Aruba mes. Paso entrante Dia 3 di Mei 2005 Serlimar y Ministerio di Salubridad y Medio Ambiente a dicidi cu ta cera e dump na Palo Marga y cu tur sushi mester wordo tira na Dump na Parkietenbos.

Esta cu e Dump na Parkietenbos ta bira e unico dump pa tira sushi na Aruba y pa cual henter Aruba mester bai tira nan sushinan na e Dump na Parkietenbos y na unda mester paga pa tira e sushi tambe. Pa Fundacion Accion Ambiental esaki ta

un locura di marca major nunca visto den historia pa cu maneho di sushi aki na Aruba.

Fundacion Accion Ambiental como organizacion di medio ambiente cu tin 11 Anja di existencia hasta awordo aserca den pasado pa e departamentonan concerni di gobierno ariba un plan con ta bai sana e dump na Palo Marga, pesey pa nos e desicion di e gobierno actual pa laga cera e dump ta hopi straño.

Fundacion Accion Ambiental hunto cu otro organizacionnan ambiental na Aruba te ainda ta pendiente di e investigacionnan cu mester tuma lugar relaciona cu e Proyecto di Dump na Parkietenbos, esaki despues cu un keho oficial awordo entrega na Ministerio Publico

di parti di un miembro di un otro organizacion ambiental aki na Aruba.

Fundacion Accion Ambiental ta spera cu tanto Serlimar y Ministerio di Salubridad y Medio Ambiente por tuma nota di e bienestar general na prome lugar y trata di duna tambe organizacionnan

ambiental y otro gremionan un participacion real, Aruba ta di nos tur y no di grupo solamente. Accion Ambiental ta kere den un programa social na unda mester tin participacion di tur instancia den nos comunidad y no e burocracia cu nos ta bibando aden awe un dia.